

Sfidas d'ina pledadra da pressa

«Spokeswomen» engiadinaisa tar la Procura publica federala

DA CLAUDIA CADRUVI / ANR

■ **Ladina Gapp sto declerar a las medias inquisiziuns giuridicas cumplitgadas – davart corrupziun, lavar daners, mafia u organisaziuns terroristicas sco il Stadi islamic. Las abilitads persuerter haja ella emprendi en il restaurant da ses geniturs a Guarda.** Schurnalists han adina prescha. Els vulan immediat respostas. Sch'els ston spetgar duas uras sin infurmaziuns vegnan els malpazients, malidis u magari perfin malhofflis, pertge els teman da betg pudair furnir ad uras lur texts a la redacziun. Cun da questa schurnalista ha la pledadra da la Procura publica federala da far mintga di.

Ma Gapp na sa lamentass sa chapescha mai. Anzi, ella s'exprima a moda diplomatica davart la collavuraziun cun las medias. «Per nus èn ils schurnalists partenaris. La sveltezza ed il ritem da lavur renda nossa lavur fitg dinamica ed interessanta. Quai po esser ina sfida.»

Massada proceduras

Set personas lavuran en il team da comunicaziun. «In'enorma massa da dumondas èsi da responder mintg'on», di Gapp. «Lungurus nun èsi mai. Igl è ina lavur complexa plain variaziun.» Momentan procura gist l'affera da Kasachstan per lettras grassas. Sche omaduas chombras parlamentaras retiran l'immunitad a cusseglier naziunal *Christian Miesch* po la procura publica federala examinar sch'il politicher ha laschè un-scher. Ma era tar in cas uschè actual na po e na dastga la pledadra betg scurlattar sias respostas or da la mongia. Pertge?

L'onni passà aveva la procura publica bunamain 500 cas pendants, plinavant passa 300 examinaziuns d'avrir ina procedura ed anc radund 300 dumondas da l'exteriur per assistenza giuridica. «Cun tants cas èsi bod impussibel da dar ina risposta senza retschertgas», di Gapp. «Ma nus empruvain adina da dar ina risposta en temp util. In 'no comment' na vegn per nus betg en dumonda.»

Tge astgan ins dir?

Sch'i vegn pia ina dumonda d'in schurnalist consultescha la pledadra l'emprim la persona che maina il cas. I sa tracta da procuratur e procuraturas ch'èn experts en differentas domenas e mintga domena posseda ses agen linguatg ch'è strusch d'enclerger senza furmaziun giuridica.

Avant che dar vinavant las infurmaziuns sto la pledadra ponderar minuziusamain tge ch'ella dastga insumma communigar. Igl è da chattar in equilibr



Currer, ir cun velo e nudar lungas distanzas – gliez fa Ladina Gapp en il temp liber. Cundiziu e schlantsch dovra ella era sco pledadra da la procura publica federala.

tranter il basegn da la populaziun da vulair scleriment e la protecziun da l'inquisiziun. «Noss rom per la comunicaziun è la lescha», di Gapp. La lescha lubescha dad infurmar en cas che possedan ina relanza speziala u sch'igl è necessari d'avertir u calmar la populaziun u sch'igl è necessari da curreger famas u novitads falladas.

Da resguardar èsi plinavant il «privel da collusiu», vul dir che tschertas personas laschan forsà svanir mussaments. «Igl è da chattar ina buna metà tranter la realitad da las medias e la realitad d'ina procedura penala», resumescha Gapp.

Agila e movibla

Nagin dals set pledaders haja in dossier spezial. Tuts stoppian da principi savair tut, di Gapp. Tar in cas francofon possia quai capitar ch'in pledader da la Romania s'occupia pli intensiv dal dossier. Ma sin plaun naziunal stoppia mintga pledader atgnamain esser chapavel da dar scleriment per tudestg, franzos u talian. Gapp discorra sper las quatter linguas naziunals anc englais e spagnol ed ins chattar citats da la «spokeswomen» perfin en la «New York Times».

Sper la flexibilitad linguistica e tematica sto la pledadra er esser movibla en il vair senn dal pled. La procura ha biros a Berna, Turitg, Losanna e Lugano. Plinavant èsi da far pichet la fin d'emna. L'entschatta avust, cura che l'avion Ju-52 è crudà giu sur Flem, è quella pledadra che aveva quel di pichet ida ensem cun il procuratur responsabel sin il plaz per coordinar la comunicaziun cun las autras autoritads involvidas. «Nus essan agils»,

di Gapp. Ella discorra era savens dal far punts – tranter il mund dals giurists ed il mund da las medias u tranter ils basegns d'ina inquisiziun penala effectiva ed il dretg da la publicitad sin infurmaziuns.

Lavurà tar il Seco e la viafier

Creschida si ed ida a scola è Gapp a Susch ed Ardez. Ses geniturs mainan la Crusch Alba a Guarda e la matta è creschida si cun in pe en il restaurant. Ella ha perquai baid emprendi co ch'igl è da discurre cun ils giasts – ina abilitad che gida oz en sia professiun. Durant ses studi da giurisprudenza haja ella adina gidà la stad en il restaurant ed uschia gist «tschüff» ses emprim job. Ella haja raquintà ad in giast da ses studi e survegnì la chaschun da sa preschentar en in'advocatura a Turitg. Dapi dus onns lavura Gapp tar la Procura publica federala a Berna. Avant ha ella rimnà experientschas en il Secretariat da stadi per economia (Seco) e sco giurista tar la Viafier federala svizra.

Scandal da corrupziun brasilian – confiscà ina milliarda

Var 500 cas eran pendants l'onni passà. La Procura publica federala ha però fatg be 21 accusaziuns. Pertge uschè pauc? Ina accusaziun è sulet ina moda e maniera co ch'ins po terminar ina procedura penala. Tschertinas vegnan concludidas cun in mandat penal, in uschenunà Strafbefehl. Autras vegnan sistidas perquai ch'il suspect inzial na sa cumprova betg. Tar il scandal da posta n'èsi gnanca vegnì avert ina procedura damai che la Procura publica federala n'è betg competenta.

La pli gronda inquisiziun che marscha da preschent pertutga il scandal da corrupziun dals concerns brasilians Petrobras ed Odebrecht. In'entira task force cun giurists ed experts lavura intensivamain. Bancas svizras han giugà ina rolla centrala ed han zuppà daners da corrupziun. Dapli ch'ina milliarda francs han ins confiscà, resorta dal rapport da gestiun da la procura. Radund

200 milliuns han ins già pajà enavos a las autoritads brasilianas. La procura ha avert en quest connex passa tschient proceduras penales, pliras da quellas han ins transferi en la Brasilia. Ma er en Svizra hai dà in'acusaziun, numnadamain encunter la banca privata PKB a Lugano. Igl è tgunsch pussaivel ch'anc autras bancas svizras vegnan avant dretgira.

Da quintar cun in'acusaziun èsi era tar Ousman Sonko. L'anterior minister da la Gambia aveva tschentà il 2016 ina dumonda da survegnir asil en Svizra. Dapi l'onni passà sa chattar Sonko en arrest d'inquisiziun ed ins l'inculpescha d'avair commess crims encunter l'umanitad.

La Procura publica federala è numnadamain era responsabla per genocids, delicts da guerra u crims encunter l'umanitad sch'ils inculpads sa chattan en Svizra.

Tge fa la procura publica federala insumma?

Mintga chantun ha sia procura publica che fa inquisiziuns en cas penals, per exempel davart ladernitschs. La Procura publica federala na sa fatschenta però betg cun ladernitschs. Ella prosegua delicts che sa drizzan encunter il stadi u ch'han in connex federal: corrupziun, criminalitad organisada, terrorissem u la finanziaziun da terrorissem. Era la criminalitad economica interchantunala ed internaziunala tutga tar sias competenzas. La gronda part dals emploiads da la procura proseguan cas economics.

La criminalitad n'enconuscha nagins cunfins. Uschia èsi necessari ch'ils pajais barattan infurmaziuns davart personas suspectadas u davart daners zuppads. Quai capita entras l'assistenza giuridica, per tudestg Rechtshilfe.

La fin dal 2017 han 234 personas lavurà tar la procura. Ils blers èn giurists, ma en l'analisi forensica da finanzas (FFA) dovri er economs u experts da banca. Sco instituziun independenta posseda la procura in'atgna administraziun cun il personal correspondent.